

袖珍
小說

怪醫西案

上海商務印書館

怪醫案目次

- 第一章 橡皮球
- 第二章 警員之報告
- 第三章 電話之問答
- 第四章 錮友
- 第五章 車中肆談
- 第六章 可怖之巨人
- 第七章 奇巧之製造
- 第八章 活動椅
- 第九章 夜遁
- 第十章 巨人復現

怪醫案 目次

第十一章 深潭

第十二章 逮捕

怪醫案

商務印書館贈

第一章 橡皮球

六月十號。天氣晴朗。當是夜鐘鳴十一下之三十分。省威斯企斯脫郡之警署中。有一捕獲要犯之馬車。上如風逐雲。直至待罪所前。截然而止。車前有警察。戈而立。車後一人亦如之。其車中則要犯五人。蜷曲以坐。盡梏其手。若就屠之豕。中坐者爲首。旁列四人。皆其同黨。又其旁則監以一警察焉。其首維何。則爲紐約省之一醫生。名楷特們。楷特們爲人狡變不測。善以毒藥中人。其考究毒藥之原理。既極精妙。能殺之。亦能生之。初無毫釐爽。故其視取人多金。如探囊中物。前時鮑咖斯及威尼斯二處之人。皆以善

製毒藥名。而其後漸至失傳。幾無嗣響。迨楷特們出。不知何自得傳其祕。且悉心研究。於製造毒藥之法。無不得其玄奧。其所成之種種毒藥。究爲何者所配合。未從知之。縱不乏格致專家。亦實窮於試驗。以故恃其隱祕。毒人之案。不勝縷指。紐約之人。以魔鬼目之。靡不望之生畏。而此案之起。則以欲謀人五百萬他拉之家產。先計匿其主壳林於他方。并毒其叔戈難斯。冀置諸死地。而戈難斯自中毒之後。神思昏迷。面作死灰色。因得紐約之名醫曰斯塔辯。診其脈。驗其沫。屬詳視察。用藥以磨擦之。歷數句鐘之久。仍無起色。人咸以必死無疑。然斯塔辯堅持己意。必欲活之。因命人舁至其室。盡其能力。時時施藥治之。逾四日。無驗。而斯塔辯終無懈志。治之

益力。又逾一日。忽見其兩眼微張。鼻端略作呼吸聲。直至中毒後之第七日。戈難斯始有生機。而神志亦漸漸甦矣。然外人皆喧傳戈難斯已死。且謂其葬於某處。楷特們聞之以爲信。遂於十號之夜。率其同謀者四人。身荷繩鋤。潛往某處。將發其棺而毀其屍。志在消滅其毒藥痕跡。使欲偵無從。以達謀產之目的。偵探尼卡忒聞而喜焉。因偵得其所必出之途。先時隱伏。突出拘之。既就拘。立報告於本處之警署。一面以車昇之往。尼卡忒既盡其應盡之責任。乃告警察員曰。茲以五犯暫寄。明日之晨。當有人來署。提往紐約。言訖。即偕其從者。乘汽車先返。當囚車行抵待罪所時。所中即有二警察出。佇立以觀。既而車前後護衛之警察。與五要犯相繼下。遂復

監察而行。齊赴獄中之寫字房。即警署辦事室在警署之達例。犯初入。環列於極高之案前。俟警察員升座。以次詢之。將該犯之姓氏籍貫。記之於冊。記時卽有檢搜之警察。細檢其身。不使其稍有攜帶。而於此次所獲之五犯。則殊不然。警員雖升座詢問。循例行之。特以五人均被梏。即使凶刃在身。亦屬無能爲力。故問訊之際。並未檢搜。五犯之中。惟醫生頗而長。冠其儕輩。而貌亦絕異四人。其面白皙。其髮黑潤。而鬚則鴟張如戟。徧於口際。兩眼閃爍如電。睛帶灰色。光之所射。望而知爲一奸險之小人。而且膂力絕倫。較之尼卡忒。殊不多讓。頃之被逮。苟尼卡忒但知鬪力。而不以計佐之。未必其果能濟事也。當楷特們植立承訊時。不惟無所懼怯。其面且現笑容。

巉巉之齒。畢露於外。距二碼之遙。則監視之警察五人在焉。此時警察以及罪犯。咸凝神壹志。闐然無聲。無何。警察長持筆取冊。置諸案前。目注五人良久。始高聲問左首之第一人曰。汝名……言未既。楷特們猛一舉手。所上之梏。倏忽下墮。恍若曾未加鎖者。楷既脫。疾探手囊中。出一橡皮小球。向空略搖。復以指力捺之。一剎那間。陡起一股之煙塵。蓬勃滿室。紛飛撲面而至。衆目一時俱梗。淚簌簌下。匪特警察輩中其幻術。卽彼同黨之四人。亦俱俯首迷目。不能仰視。且厥狀若甚痛楚。有騰擲而起。狂捲地上者。楷特們則既捺小球後。疾蹲身狙伏於下。閉其目。按其口鼻。靜俟移時。知飛塵稍定。衆已墮其術中。於是徐徐起立。逕出署所。而頃者所乘之馬車。

尙駕門外。惟左右闕無一人。遂拾鞭騰躍而上。舉手一策。車馬飛馳而前。此時夜色深沈。游人稀少。正遂其逃逸之計。卽間有見之者。以爲此乃警署之車。其馳如飛。必有要事。舉莫敢阻止之。當時警署諸人。自中楷特們毒藥後。痛楚異常。無不以手掩目。不遑他顧。又越數分鐘時。其苦益甚。但覺眼簾之內。若被刀割。而且咽喉鬱塞。氣爲之閉。惟其心則清醒如故也。雖極力欲呼救於人。而喉音所發。暗不能聲。且時作狂嗽不已。其從犯四人。則以手俱被梏。不能動作。且亦同受其毒。故未逃逸。此時舉室之人。除呻吟呼痛外。一籌莫展。正危急間。適有送牛乳者。擔而入其門。聞室中有奇異之聲。諦而聽之。則又不甚了了。心大疑。疾趨而入。則見衆皆閉目而呼。

問之不答。又問之。則各舉手指其面。其人心知有異。審察再三。稍稍悟其意。亟取牛乳一瓶。傾注室隅之盆中。浸以巾。爲衆沃其目。繼復以牛乳分飲之。衆既沃且飲。又逾十五分鐘。目漸能啟。而痛亦少定。回顧壁上所懸之時鐘。已指一旬三十分。計中楷特們之毒。而昏迷顛倒於室中者。蓋已一時餘矣。始向門外偵其車。則已不見。知楷特們必乘之而逸。然更深人靜。莫從而探其蹤跡。翌晨。警察四出。始得其車於距警署三英里外之荒郊。鞍轡擲地。馬則杳然。後乃於紐約城中覓得之。是楷特們必舍車乘馬以往紐約。於此可見。第其入城以後。更竄匿何地。則又杳如黃鶴矣。

第二章 警員之報告

翌日之午。尼忒卡兀坐一書室中。相對者卽威斯企斯忒之警察員也。警察員舉昨夜楷特們被逸之事。一一述諸尼卡忒。尼卡忒曰。此事我旣知之。但其手楷之忽然自脫。其故安在。君知之否。警察員曰。此實茫然。思之竟不得其故。尼卡忒曰。所脫之楷。君曾寓目否。答曰。曾取而閱之。尼卡忒曰。其楷果自脫乎。答曰。不然。似必有鑰以啟之者。尼卡忒曰。僕恐其途中或有疎虞。特手自楷之。其楷且倍緊。必不能自脫。其果誰爲啟之乎。答曰。是誠不解。或彼自啟之。尼卡忒曰。彼與同黨之四人。互相聯屬。而彼又居中。左右俱爲所牽制。彼烏從啟之。試問曾有面生之人。至其側乎。答曰。自彼下車入室。監視彌嚴。初未與外人相見。以意度之。或預置一鑰於懷中耳。

尼卡忒曰。是未必然。無論彼之鑰。詎必恰合。卽合矣。而兩手既枯。焉能啟之。警察員曰。尼卡忒君乎。此中奧妙。我至今思之。終不能得其一二。尼卡忒曰。僕非好爲喋喋。特以茲事重大。與君亦干未便耳。君亦曾將此各情。一詢彼同黨四人乎。答曰。楷特們逸後。亦曾究問此四人。尼卡忒曰。彼何所言。答曰。皆言不知。尼卡忒君乎。試思彼卽知之。詎肯據實相告。尼卡忒曰。楷特們舍其同黨。縱身獨逸。彼四人者。其亦有怨詈之言乎。答曰。有之。咸怨楷特們之相負。尼卡忒曰。彼雖怨甚。至楷之所以脫。彼終僞爲不知乎。答曰。然。尼卡忒曰。君殆爲所誑矣。曾亦思苟無啟之者。楷其甯能自脫乎。是必於車中爲之。實無疑義。警察員曰。君言誠是。第彼終不承。奈何。尼卡

忒曰。車中監視之警察爲誰。答曰。湯姆森。尼卡忒曰。其人若何。能保其無賄縱之事乎。答曰。人甚誠厚。決不至此。尼卡忒曰。然則車以外所立之警察何如。答曰。署中之人。皆甚可信。尼卡忒曰。信如此。則楷特們逃遁之情。僕實有所不解矣。今且勿論此。既被脫逃。必速爲偵之。毋使漏網。警察員曰。鄙意亦然。務使就獲而後已。尼卡忒不禁大笑曰。設果獲之。試問處之之法。警察員曰。我受其荼毒已甚。苟就獲。我將立扼其咽喉以殺之。尼卡忒曰。恐君之手未及其喉。而彼已如提小兒。擲君於數武以外。吾閱人多矣。未有若楷特們之勇力過人者。警察員曰。所言信乎。尼卡忒曰。烏得不信。警察員曰。彼亦猶君之勇乎。尼卡忒曰。殆有甚焉。且其狡詐百出。尤難對

付。警察員曰。誠然。尼卡忒又曰。汝頃言目爲之迷。至其以何法迷汝之目者。能言之否。警察員曰。僕於循例詢問時。忽見楷特們身似略退。手一皮球。屢搖不已。我正欲叱令監者。再楷其手。陡覺塵埃亂起。撲面而至。一時兩目盡梗。至痛極而倒。倒時喉間鬱塞。暗不能聲。蓋其毒之所施。特一舉手之勞。而我等已顛倒室中。不復能移寸步矣。尼卡忒曰。餘黨四人。所受之痛楚。其亦無異於君乎。警察員曰。然。尼卡忒曰。四人與楷特們相處。不識始於何時。警察員曰。據言事前實非相識。第於盜屍之前三日。始得相遇。尼卡忒曰。君其信之乎。警察員曰。僕雖未敢全信。第據彼所說。似非盡屬子虛。尼卡忒曰。彼何所言。警察員曰。據言日前楷特們曾造四人之室。告

以昨得一夢。恍若戈難斯死而復甦。力乞相拯。因欲偕至塚旁一視。事如屬實。將啟而出之。否則亦可一釋其疑。且允以五十金相酬。先付其半。其款皆悉數在囊。驗之無爽。以此觀之。似非妄言。惟四人不辨假真。據允其請。雖非與楷特們相聚有年。當亦非馴良之輩。不言可知。尼卡忒曰。僕意亦以爲然。君歸時。可得前此所撮案犯之肖像。一一驗之。有無此四人在內。苟或有之。則其作惡不始於今日。自應重懲之。警察員曰。當如君命。惟今晨總署來提此四人。故四人已解交城內。其貌無徵。君其能辱臨敝署。同往一檢否。尼卡忒曰。君不言。僕幾忘之。四人既解送城中。僕尙須至總署。謁見警察長。此後四人之關繫。與君已無涉矣。警察員曰。雖然。第楷特們

之逃逸。在我總難免玩忽之罪。奈何。尼卡忒曰。此亦無庸過慮。彼之逃逸。實出人意料所不及。情自可原。顧此亦僕之過也。楷特們如此狡詐。瞬息千變。患在我捕獲以後。未曾一檢搜其身耳。君因此或有拂意之遭。僕當盡其綿力。出而相助。警察員曰。謝君盛情。我甚心感。尼卡忒曰。人之處世。百密容有一疏。君今遭此。亦正所以相警也。試問其車已得之乎。警察員曰。得之於三英里外。將近紐約之荒郊。尼卡忒曰。其馬若何。警察員曰。頃僕來此時。途中曾得警察之報告。謂其馬躑躅於城中之街東。鞍已無存。為站街之警察所見。因牽而繫之。尼卡忒曰。然則楷特們必乘馬而至紐約。特不識彼曾返其辦事室否。警察員曰。彼之辦事室。距此雖遙。然電話可

以相通。君曷不試一問之。以覘其虛實。尼卡忒曰。君言雖是。但鄙意以爲彼未必在此。即使逃逸後。曾返是處。此時亦必他往矣。彼豈不知匿於其居。且爲警察所搜得。其將何以自脫乎。警察員曰。就令如此。然何妨於我在此時。君其姑一試之乎。尼卡忒諾而起。取電話之號簿於手。檢視數四。旋得其辦事室之號數。遂搖動電話之鈴。以長筒置耳際。陡聞隱約有聲自筒中來。尼卡忒卽問曰。此非楷特們醫生之辦事室乎。但聞答曰。誠是。尼卡忒非常注意。又問曰。醫生在此否。答曰。在此。爾爲誰。尼卡忒曰。有曾延診治之人。欲與之一談耳。答曰。請以姓氏告。尼卡忒曰。奚必是。請醫生速來。自能知也。又答曰。旣欲與談。何得自隱其名。尼卡忒曰。然則汝可言哈

爾登請見。答曰。尙容轉達。請少待。言已。聲遂寂然。少頃。筒中忽隆隆然有聲。果畢肖楷特們之語音。自內而至。曰。旣欲相語。試言何事。

第三章 電話之問答

尼卡忒爾時所遇。斷非意料所能及。故驟聆楷特們之問。幾窮於辭。移時。始答曰。汝其楷特們醫生乎。言未旣。但聞電筒中笑聲吃吃。藐然而答曰。然。汝得非尼卡忒乎。尊名甚佳。胡今日忽名哈爾登耶。尼卡忒曰。汝言甚是。試問晨間健乎。楷特們曰。昨於警署小施麻藥而已。亦不無稍受其毒。今則告痊矣。汝之呼我。意欲何爲。尼卡忒曰。無他。不過欲探汝之行蹤耳。楷特們曰。在汝意中。殆不料我尙居此也。尼卡忒曰。汝

尙居此。誠非所料。楷特們曰。旣得我之蹤跡矣。敢問猶有他乎。尼卡忒曰。將與汝修相見之禮。楷特們曰。當相見於何處。尼卡忒曰。城中之警署何如。楷特們曰。旣見之後。必有所言。苟出於誠。固無不可。第相見於警署。汝又將爲羈我計矣。尼卡忒曰。否。我決不遽爲此。今與汝約。我二人午後相見。汝其能允之乎。楷特們曰。能。惟中有三事。必汝先立誓允之而後可。(一)祇能爾我相對。他人不得參預其間。(二)不得託言聚首。陰謀陷人。(三)旣見之後。必逕至三句鐘之久。始得以相聚之說。顯露於人。卽斯時爾我之言。亦不得遽爲外人道。尼卡忒曰。所約平易可行。似皆可允。味言中之意。汝亦未嘗不以一見爲快。楷特們曰。然。但今在汝之側者。亦尙有他人

否。尼卡忒曰。有之。其人非他。即威斯企斯忒之警察員也。昨汝亦曾一見之。楷特們曰。然則爾我所言者。彼必已盡聞之矣。尼卡忒曰。安得不聞。楷特們曰。頃太鹵莽。我甚悔之。但汝言已盡於斯乎。尼卡忒曰。猶有一言。我既允不以陰謀陷汝。汝亦必以我之道。施之於我。楷特們曰。我自當允汝所允。有約於前。而或爽之。非男子也。尼卡忒曰。恐未能心口若一耳。楷特們曰。我縱以不軌於正。見惡於人。然一言之出。必期實踐。且我與汝方欲引爲知己。甚不樂互相仇視。幸勿見疑。尼卡忒曰。相見於警署。汝旣不以爲然。試言其處。楷特們曰。我聞尊處有一汽車。相距雖遙。當必勿計。今晚七時有半。請君卽乘此車。辱臨我辦事之室。尼卡忒曰。吾固無乎不可。惟汝

則未免太屬冒險。以汝之辦事室。警署必甚注意。或派人偵之。相見之下。爲時稍久。保無警察乘間而入。爲禽汝計者。我則先事而言。脫有此情。不在我所允之例。楷特們曰。就令事出意外。決不相怪。尼卡忒曰。既若此。屆時自當踐約。楷特們曰。車近辦事室時。其行須緩。我當伏於中道上車。以代司機鍵。尼卡忒曰。此又何意。楷特們曰。無他。不過欲求自甯而已。尼卡忒曰。此則恐難如命。楷特們曰。我代司機鍵。決不使汝車稍有所損壞。汝之所慮。蓋恐我或有他意耳。然我既身在車中。卽已入汝勢力範圍以內。汝豈猶不能以我之信汝者信我乎。尼卡忒曰。汝言亦是。當勉如所請。楷特們曰。所約既定。容再相見可矣。聲遂寂。尼卡忒卽以長筒仍置原處。旋身

謂警察員曰。君聞之乎。警察員曰。不盡了了。尼卡忒曰。楷特們欲掃去前嫌。共敦和好。吾已暫允其請。捕獲之計。今姑緩議。俟我與彼會晤之三小時後。然後再設計拘之。警察員曰。鄙見甚不謂然。設我與君易地以處。彼雖以重利啗我。亦決不願遽如所約。僕有一言。請恕狂妄。今君此舉。未免癡耳。尼卡忒曰。否否。君尙未識僕命意所在耳。警察員曰。君命意果安在。豈薄暮之一見。果有利於汝乎。尼卡忒曰。此亦非事前所能逆料也。警察員曰。既云非所逆料。是利與害必相等。然以僕所見。則君之此舉。直有百害而無一利者。尼卡忒曰。否。蓋凡巨奸大猾。無不恃其狡詐之才。以濟其惡。而凡有濟惡之才者。率不能免乎自是之一心。然其敗也。亦率以此度。

楷特們所以請見之意。非有他因。不過欲自炫其才耳。而僕乃變其初心。遽如所請。則實有深意在。蓋欲乘機而入。藉此一覘其底蘊。並彼意向之所在。以爲逮捕計耳。警察員曰。君之所爲。僕竊爲君危之。僕不解君果何樂而出此。尼卡忒曰。君尙未明僕意耶。僕當再爲君告。今晚七時三十分鐘。僕赴楷特們之約。既見之下。僕卽臨機應變。僞與相親。並乘間以甘言爲餌。使彼暢所欲言。以覘其實。然後設計羈縻之。令無遠遁。而彼乃終入我掌中矣。所謂欲取先與。策莫善於此耳。警察員曰。他非我所知。惟願其早罹法網而已。尼卡忒曰。是不難。第今此一舉。請勿爲外人道。君其能允之否。警察員嘿然不能答。

第四章 錮友

二人寂寂相對者移時。尼卡忒危坐如故。目注警察員之面。莞爾而笑。已而問曰。頃者所言。君果能見允否。曷相示。警察員瞿然曰。是不能。僕親見君之身入危地。烏能坐視。尼卡忒兩肩微聳。婉言而答曰。君既堅執不從。僕亦何敢相強。試問君其欲得雪茄而吸之乎。言既。授以雪茄一枝。警察員曰。謝君見惠。遂受而吸之。尼卡忒又謂之曰。坐久殊不耐煩。頗思散步。君意若何。警察員曰。甚願。尼卡忒又曰。敝居雖小。園中風景頗不俗。尙足悅目。君苟有意游觀。當爲先導。警察員曰。敬諾。尼卡忒曰。游觀之秩序。當自外而內。君其然乎。警察員曰。甚善。於是尼卡忒爲導。先自園中游賞片晌。然後由外達

內。歷階而升。抵一巍然傑峙之層樓。此樓形式絕奇。出入僅有一門。啟之之法。祇能自外以推。若身居其中。縱百計亦不得啟。其門既極堅固。而四壁又無窗牖。所賴以通一綫之光者。惟此頂上之天窗而已。其旁更有絕大之鐵幹。以作柵欄。尼卡忒所以築此堅室。非爲息偃之所。將以待奸宄盜賊。爲法律上所不能容之人。既經捕獲。或暫錮於此。以待轉解警署。而一入此樓。卽極聲以呼。亦不能達於戶外。外人亦未從知之。當二人行且近。尼卡忒卽指其祕室。遜警察員於前。殷勤謂之曰。曷勿入內觀之。警察員並不滋疑。縱步而入。不期足纔進戶。尼卡忒立闔其門。自外扃之。任其大聲相呼。置若罔聞。乃徑自梯而下。達其書室。靜坐觀書。意殊自得。忽夥友

企克舉帷入。尼卡忒乃置書於側。問曰。近亦有所聞否。企克曰。非指楷特們之逃逸而言乎。彼既逸去。君諒必設計追捕之。尼卡忒曰。然。但必遲至翌日之晨耳。企克曰。欲得我之相助否。尼卡忒曰。且待臨時再議。企克頗爲疑訝。因問曰。既須捕獲。曷不及早圖之。君謂必待之翌晨。斯何故歟。尼卡忒曰。非有他意。特不欲急急從事耳。企克曰。請問其故。尼卡忒曰。至時我自相告。此非其時。我非故爲隱飾。特恐一經明言。則阻力橫生。吾計有未能實行者。吾有一言。君其識之。薄暮之際。設遇楷特們於途。可將拘獲之責。暫置度外。切勿前犯之。毋忘我囑。企克益疑異。曰。是又何故。君苟不爲剖明。僕實不能奉命也。尼卡忒笑曰。析言其故。固無不可。特既言之後。仍

須一如未聞。必俟明晨以後。乃可實行追捕之計。君如見允。始敢相告。否則甯不言也。企克曰。君第言之。我當如約。尼卡忒遂將楷特們所約之言。并已所以欲見之意。一一述諸企克。企克曰。立意甚善。特不識楷特們之約。果所懷何意耳。尼卡忒曰。此則非我所料。企克微笑曰。僕盡知之。無非以君才藝絕人。足以箝制之。使不得逞。遂欲以陰謀陷君耳。此一去也。君其危哉。吾意甯蹈爽約之愆。毋以不智遺他人笑。尼卡忒默然不語。既而曰。吾以爲楷特們斷不至此。即使如是。而我旣允之於前。亦當一往。企克曰。試問相見之約。發端於何人。尼卡忒曰。是吾意也。言至此。二人各持己見。相對無言。少焉。尼卡忒又曰。頃者有一不速之客。爲僕錮之密室之中。君

知之否。企克不解所謂。亟問爲誰。尼卡忒曰。非他。卽威斯企斯忒之警察員也。因我與楷特們言時。彼曾屬耳於旁。我囑其勿洩。彼不允。但彼一歸告之警署。則捕者且立往。而我將失信於楷特們矣。故將彼暫錮於此。又恐警署以彼時久不歸。或生疑慮。因擬發一電話於警署。謂彼議事未已。因下榻焉。明晨卽當返署云云。此事卽煩君代我行之。企克應命。尼卡忒又曰。僕旣將此情明告於君。君當知我命意之所在。而不至更阻我行矣。企克曰。雖如是言。鄙意終以不去爲善。卽不然。或能使僕附驥一行。以防其變。可乎。尼卡忒曰。是不能。企克曰。旣不能偕。則我將先期而往。隱身其間。以一覘之。君其能允我乎。尼卡忒曰。非僕吝於一諾。實以此皆有違前約。

未敢貿然相允耳。企克曰。君雖言出如山。竊恐彼未必能如所約。前二者既未能邀君之允。則惟有俟君行時。僕遠遠以踵君後耳。尼卡忒曰。此亦須俟我之允許。安得擅踵我後。企克曰。君之所言。僕置若罔聞。君其何以處僕。尼卡忒正色曰。果若是。永不認汝爲吾之輔矣。言時。色容端肅。意頗悻悻。企克見其百折不回。而已屢反其意。懼撻其怒。遂婉辭謂之曰。前言特戲之耳。君何怒爲。尼卡忒曰。吾亦知君之戲耳。二人語至此。又復寂然。企克旋離座。躑躅室中。有頃。謂尼卡忒曰。陷人之術。若果操戈執刃以鬪。固不足慮。惟此施毒之慣家。如鬼如蜮。防不勝防。昨威斯企斯忒警署之事。其前鑒也。雖曰警察員之疏略。有以致之。然使疇昔之夜。置君於警署之

中。試問楷特們之逸。君能防之乎。楷特們之所以橫行遠近。陵轢無前者。蓋恃乎此。今夕之約。其危險恐尤有甚焉耳。尼卡忒曰。君言似太過慮。企克曰。僕幾忘之。試問君相見之處。曷請見示。尼卡忒曰。此實不能相告。企克曰。我思兩全之道。莫若使我伏於相近之處。倘能徼天之幸。彼此皆恪遵所約。是爲最善之策。否則僕亦得疾趨而前。以爲援助。是猶不失爲中策也。尼卡忒曰。君之計雖善。但我志已決。必不能見允也。企克聞言。無詞以對。且見其堅執如此。雖言無益。遂亦默然。

第五章 車中肆談

是夕七點三十分鐘時。尼卡忒獨乘汽車。疾如風電。直抵楷

特們醫生辦事室前。戛然而止。不謂車甫停止。不後不先。有二人各負粗布所紮之小包一。自內而出。疾趨汽車之旁。擲小包於車上。二人之中。其一狀貌似黑種人。既置包訖。黑人卽反身去。其又一人。卽縱身而上。兀坐車中。不待尼卡忒之命。自轉其關鍵。車復疾馳。尼卡忒初尙不辨其爲何許人。驚疑殊甚。無何。車行向北。漸入康莊。電燈燦若列星。始克覩其面。則其人非他。卽楷特們也。因低聲謂曰。楷特們君。車行若飛。未免太捷。恐警察見而相阻。致多鞶韉。楷特們曰。無傷也。君不見我曾未改飾乎。我且勿虞。君何畏焉。尼卡忒曰。君之辦事室。亦曾有警察至乎。楷特們曰。我自逃逸後。安居於此。並未遷移。然能知我之所在。而與我通電話者。惟君而已。他

無一人也。尼卡忒曰：壯哉楷君。君之膽誠非細矣。試問今將何往。楷特們曰：既抵其處。當以告君。尼卡忒曰：前者所負之小包。其果何物也耶。楷特們曰：區區之物。何勞見問。第人既他往。不欲將此物獨遺於辦事室。故攜以俱往耳。語至此。又微笑曰：尼卡忒乎。君真不愧爲世界上勇敢之人。尼卡忒愕然曰：此何謂也。楷特們曰：我以險詐著。而君能毅然踐約。置一身於我勢力範圍之中。非勇敢耶。尼卡忒曰：安見其若是。楷特們曰：他術且勿論。吾但於此崎嶇之道中。速其機關。可使此車之立碎。試思碎車以後。君猶有生望乎。尼卡忒曰：同在此車。我不能生。君豈能獨免於死。楷特們曰：死同也。然或則重於泰山。或則輕於鴻毛。則一死固判若霄壤矣。僕生於

世動輒招尤。幾無生人意趣。是鴻毛之類。烏能與君作比例者。雖然。猶有說。我旣設謀以陷君。則已所以遠害之計。籌之必熟。安有巧於陷人者。轉拙於謀己。而使同歸於盡耶。尼卡忒曰。無謂之談。徒勞脣舌。請勿復言。楷特們置若罔聞。又曰。且吾可以空閒之左手。探囊取毒藥之針。乘間猛刺。恐車行未百步。而君之名已登鬼錄矣。尼卡忒被其煩瀆。頗覺不耐。忿然曰。汝約我相見之意。乃僅言此而已乎。楷特們曰。否否。特以我之爲人。君所深惡。今乃與素所深惡之人。入此偏僻無人之境。非具絕大之膽量者不能。前之所言。所以表君之勇敢而已。非有他焉。尼卡忒曰。吾亦未嘗深惡於君。苟有此心。安肯踐今日之約。楷特們曰。若謂無惡於我。則藐視之心。

固難免也。尼卡忒曰。此君或就其迹而誤會之耳。實亦未嘗有此心。楷特們曰。無論如何。愛之一字。君必不能發生於胸臆。向者苟無諄諄之約。恐一晤而後。又將設計擒之。使我重居警署中矣。顧何自開罪於君。而相迫至於此極耶。尼卡忒曰。以個人言。我與君分道而馳。絕不相涉。以社會治安上言。則我與君不免適成對峙之勢耳。楷特們曰。我意君不過感於密司戈難斯之情耳。尼卡忒曰。烏得有是。楷特們曰。然則君何爲念茲在茲。而不能忘情於我。雖然。君亦太不自量矣。尼卡忒曰。何謂不自量力。君乃得罪於社會之人。而吾則以偵君爲應盡之責任。正如冰炭之不相容。初非有惡於君也。楷特們曰。雖然。吾今者更欲與君立一約。卽以此時始。不再

侵我之自由。君其能見允否。雖我輩相見之本意。固未嘗因此語至是。忽止。旋又轉言曰。我幾忘之。君欲得百萬之他拉乎。他拉美幣名尼卡忒曰。家道雖不甚富。顧已具有二三兆之他拉。於願已足。不更貪得矣。此約未敢見允。楷特們曰。我更詢君一言。頃者電話中所訂之約。以尊意度之。吾能恪遵之否。幸實告我。毋稍隱飾。尼卡忒曰。吾以爲言出於口。自必守之。反是似非君所欲也。語頃。車轍自橋而過。已抵西乞斯脫郡界。尼卡忒曰。路已不爲少矣。尊意究欲何往。此時能見示否。楷特們不卽置答。少焉。始徐徐曰。實告君。距此約五里許之叢林中。我有一鍊物所在焉。幽深闐寂。人莫之知。今欲與君聚談於此。且以世界不經見之物。出而示君。君亦可藉此一

擴眼界。想樂從也。尼卡忒曰。既曰不經見。自必深藏不露。非盡人皆得而觀之。而獨以示我。何歟。且此不經見之物。試言其名。楷特們曰。既見之後。乃可明言。蓋凡此罕覩之物。一經預洩。卽無奇矣。此時車又循路而旋。距前時所行之大路。相隔已遠。四顧荒寂。杳無人聲。惟聞汽機之相激而已。無何。楷特們又抗聲言曰。尼卡忒君。吾雖不軌於正。然亦非窮凶極惡者可比。人奈何遽以此控我哉。尼卡忒曰。特不免藉險詐之術。以陷人耳。楷特們曰。誠如君言。將何所據。尼卡忒曰。君毒戈難斯之藥。不知斯塔辯醫生何自而得之。恐不免化出其原質耳。楷特們曰。然是誠有之。願彼卽驗之。畢生終不能得其配合之原質。我藥之祕。惟恃乎此。尼卡忒聞言。莞爾而

笑。自思彼藥之祕。人莫之知。今既偶言及此。我益當以言餽之。或者得聞所未聞乎。因相謂曰。楷特們君。汝誠深於毒物學者。願汝術果傳自何人。而能專精若此。車中閒暇。汝曷勿道其一二。以破寂寥。楷特們若有所思。未即作答。有頃始作而復坐。傲然曰。君果不以我爲矜誇乎。我實告君。我於毒質之品類。配製之良法。悉心研究。深得此中之奧。世人無能及我者。然其術我亦偶爾得之。憶我少壯時。游學他邦。曾自威尼斯而羅馬而印度。足跡所及。爲地至遠。初亦無研究毒物學之心也。不謂於無意之間。得埃及人及非尼新人所著毒物學一書。此書乃祕而不傳。未經印刷以行世者。我當時既獲此書。旦夕服膺。久之。遂能窮源竟委。盡得其傳。以故數百

年未經發明之祕。我獨能發明之。而使纖悉靡遺。循是而往。世界上所患之病。無不可自我治之。而世界上所未患之病。亦無不可自我染之。此我術所以卓絕於一時也。尼卡忒曰。格致精微之理。雖浩無涯涘。而毒物學亦其一端。君苟由此而進求之。來日方長。不誠足爲世界之偉人耶。楷特們曰。卽以此時論。已不失爲世界之偉人。奚待來日。尼卡忒曰。君言雖是。顧凡非常之人。必當作非常之事業。以求自立於世界之中。君奈何甘於小就。而爲此瑣屑之事。以自污其人格耶。楷特們曰。是固非吾之本意。特以絀於理財。遂不免藉此爲牟利計耳。尼卡忒曰。旣爲利計。曷不就合於理者求之。而顧必出此。楷特們曰。中道而行之。雖覺差勝一籌。第收效未免。

太緩。言次車已轉入深林之中。雖道路分明。而狹窄無比。路旁扶疏環繞。綠蔭參天。已而新月漸上。皎皎清輝。漏入其間。不啻畫圖一幅也。旋聞楷特們告曰。尼卡忒君乎。車將抵其處矣。

第六章 可怖之巨人

自楷特們肆談毒物學之功用。洋洋灑灑。議論絕奇。尼卡忒聞所未聞。自思楷特們固深於此道者。特其用心太偏。已入於殘忍一道。將來或不免癡狂之疾。而其癡又非世之所謂癡者。世有以迫欲求學之故。惟日孜孜。致廢寢饋。積之既久。遂成爲癡。此卽世所謂書癡耳。其癡猶常也。相傳昔柏乃舍斯痛惡波羅米西之爲人。被以桎梏。學之於頑石之側。以火

灼之。又倩一工於畫圖者。繪其受苦之狀於布。雖波羅米西滔天之惡。有以致之。然非柏乃舍斯之癡狂殘忍。斷不至有此無謂之舉動。猙獰可怖。今觀楷特們之爲人。及其一言一動。殆將類是。是時汽車所經之路。崎嶇不平。老樹臥地。時絆車轍。迨後左旋右折。始抵一高坡。坡之側有一深潭。繞入潭後。則豁然一幽窟現焉。蓋以坡前林影參天。阻礙目力。致爲所蔽。當時車抵坡上。楷特們卽止其機。謂尼卡忒曰。至矣。請君卽行。車上所置之小包。並望代攜其一。尼卡忒曰。君下車後。意欲何往。楷特們以手指窟而答曰。我之試驗室。卽在於此。請與君共入焉。尼卡忒俯首一望。但見榛蕪滿目。荒僻無比。頗躊躇不敢進。因曰。入此荒廬。殊非吾之所願。言已。植立

不動。時二人所立之處。樹蔭略疏。月光穿隙而入。與車旁所燃之燈光。互相映照。厯厯可觀。楷特們乃前握其手。相謂曰。請勿作此沉吟之態。我非有他意。特欲以罕見之物。出以相示耳。過門不入。君何怯也。尼卡忒仍猶豫不能決。蓋彼之一生。縱不知畏懼之爲何物。但履此僻地。而又深入其巢穴之中。萬一楷特們而外。更有彼同黨之徒。羣伏於此。則已以孑然一身。彼衆我寡。其何能敵。所約固不足恃。就時論事。亦不宜輕身入此。或遭不測。正自忖間。楷特們又曰。沈思何爲。我先入矣。言訖。卽取所置之小包。以其一肩負如前。循月光所照。徐徐向幽窟而去。斯時車旁之燈。已爲楷特們所熄。仰觀皓月。分外光明。尼卡忒屹然獨立。目送楷特們之去。見其循

路而前。絕不回顧。繼乃攀籐附葛。愈行愈低。漸遠至於不見。而足音登然。猶留耳際。又見車上所置之布包。楷特們僅攜其一。尙遺其一於車中。尼卡忒亦棄之不顧。輕步躡跡而前。瞥見潭之左側。桂樹叢叢。枝幹交錯。其間頗可藏身。遂隱其處以待焉。約歷一小時之久。但聞風吹落葉。隱然作聲。未見楷特們之來。尼卡忒不覺陡生疑異。欲出偵之。甫一舉足。忽聞輕步之聲。自下而上。遂復駐足以俟。無何。月光之下。遙見楷特們緩步而至。身既上。忽又以手據地。作四足行。揣其意。一若惟恐爲尼卡忒所聞。因而戒備者。而尼卡忒則未知其意之所在。不敢冒昧以嘗試之。遂復狙伏如故。以覘其異。但見楷特們行近距車三四碼之處。陡然起立。探首四望。隨又

邁步至車前。審視一過。狀頗驚訝。喃喃自語曰。彼何往耶。豈真懷懼而逸耶。既而曰。彼既敢踐所約。自非恇怯之輩。必不至此。或者於我行時。迹於我後。及見我去而復返。遂匿跡於他處耳。因又躑躅坡上。眺望一周。似仍無所見者。旋匆匆至車中。復取前時所遺之小布包。肩負向原路而行。尼卡忒見其既去。自思終匿於此。亦屬無謂。惟究宜深入窟中。一探其祕。抑或乘間乘汽車而回。俟三小時以後。再行追捕。此中頗費躊躇。惟以事理觀之。由前之說。誠不免於冒險。由後之說。似較穩妥可行。第去來草草。終貽人笑。亦屬非計。遂步出叢林。循楷特們所往之路。躑躅以前時行時止。以察動靜。一路備極崎嶇。行殊非易。幸林木披離。得以攀援而進。迨既下。則

叢林忽盡。地以條石鋪之。而有一精緻之室在焉。戶牖洞開。燈光閃爍。尼卡忒既近其處。側耳移時。杳無聲息。因思何不潛至窗外。伏身黑隅之中。一窺其室。即使楷特們偶爾外出。亦不致遽爲所見。遂蛇行而進。伏身於短牖之下。屬目其間。不謂目纔向內。卽不禁咄咄稱奇。蓋室中置有一極大之桌。桌上儼然高起。臥一絕巨之人身。自腰以下。覆以氈毯。而楷特們行所無事。一若不知己之在外。抑或知之而毫不在意者。俯立於巨人之上。其面與巨人之首部。相離不過數寸。諦審移時。旋復舉其左臂離桌數尺。撫弄良久。仍置原處。既而右臂亦如之。右臂既置。復舉其左。更番遞舉。歷久不休。尼卡忒竊視久之。至於目定口開。驚奇不可名狀。默思此桌上之

巨人果生乎死乎。楷特們之再三撫弄。又何意乎。愈思愈疑。益益不解。兩目則或注楷特們所爲。或注巨人之身。窺視良久。轉念此巨人而果爲人身。無論其爲生者死者。而偉大若此。實所未見。以我觀之。其長殆逾於八尺。頃者彼所言罕見之物。出以示我。殆即此歟。果爾。則楷特們之爲癡狂。決無疑義。此特其流露之一斑耳。思至此。仍注目於楷特們之身。而楷特們則尙舉左置右。舉右置左。撫弄其手不已。雙眸炯炯。審視巨人。尼卡忒自忖曰。遙度此情。楷特們殆未必有同黨在此。我不妨稍弛其防。但此時所猶當戒心者。則防彼之施毒而已。然我苟相離較遠。彼卽無所試其技。二者旣不足畏。而袖中更有防身之手槍在。曷勿全其終始。以畢乃約。且桌

上之偉人究屬何物。我亦得近察之。以一擴眼界。主見既定。遂歷階而升。昂然入室。楷特們撫摩如故。若不知其入者。尼卡忒亦嘿不作聲。潛立其後。良久。但見楷特們舉置如恆。首不回顧。而口中忽大聲呼曰。尼卡忒君。來何遲耶。請恕不莊。室之隅有一椅在。可移以坐焉。我有一言。將舉以相告。

第七章 奇巧之製造

尼卡忒聞言。乃移椅近前。踞坐其上。口吸雪茄煙一枝。淡然問曰。君果何所爲乎。楷特們並不回顧。答曰。此特傀儡而已。然亦人身之模範也。尼卡忒曰。是果非人身也耶。何頃我於戶外窺之。覺神情畢肖。絕類夫人。楷特們曰。雖非人身。然俟我試畢之後。少焉卽動展如生矣。尼卡忒聞之。不覺失驚曰。

君此言令人奇異。適車中所謂不經見之物。非卽此耶。楷特們曰。然。卽此是也。尼卡忒曰。吾殊不解此傀儡之身。何以膚髮之間。初無稍異。楷特們曰。幾見人身有若是之偉大者乎。尼卡忒曰。以言偉大。雖不概見。然亦不足爲奇。蓋昔有以巨人出示於衆。以歛人錢財者。其身之偉大。與此亦不甚相遠。君其允我近前一觀之乎。楷特們曰。摩弄旣畢。固無不可。斯時則不能允也。尼卡忒曰。約需幾許時。摩弄可畢。楷特們曰。是亦不能預定。緩則非小時不可。速則不過數分鐘而已。爾時楷特們雖從容不迫。應答如流。而其首未嘗偶一回顧。播弄愈勤。尼卡忒又問曰。此偉人果何物所成。楷特們曰。此亦未便預告。請少安毋躁。自能知之。言畢。又復寂然。迨約歷三

十分鐘之久。楷特們猶復掉弄不輟。尼卡忒躁急殊甚。且觀之既久。初覺其奇異者。今則厭恨而幾不欲觀。因眺望窗外。以徐俟之。不謂一回首間。忽聞楷特們大聲一叱。急再返視。則見巨人已危坐桌上。胸頭微吸。筋露稜稜。兩目亦熒然睜視。首則時俯時仰。脣齒張合。屢屢不休。棕色之髮。飄如飛蓬。尼卡忒驟見此傀儡之身。兀然起坐。動作無異生人。且其身量之偉大。狀貌之凶惡。益覺猙獰可怖。一時事出意外。不禁惶駭非常。瞿然起立。楷特們乃笑止之曰。尼卡忒君。請安坐。勿驚。倘君欲諦視之。此其時矣。尼卡忒見其語含譏誚。乃復勉坐椅上。自思世界奇異之物。當無逾此。以如是呼吸生動。舉止靈活之人。而謂爲傀儡。苟非身親目擊。其誰信之。思念

間更以兩手揉目。逼近視之。旋見巨人面色忽變。頃之盎然如生者。今則灰敗無異於臥時。其身亦漸仰漸後。未幾仍倒桌止。楷特們見其既倒。急趨至偉人之旁。以其手分置左右。旋舉覆足之氈毯。覆其全身。覆畢。狀若非常勞瘁。默爾不言。探囊出雪茄一枝。燃以火。啣之口中。向室隅之睡椅。徐徐倚坐。少焉。謂尼卡忒曰。余體憊甚。思少休。請君暫緩與言。言訖。雙眸漸合。鼻息如雷。尼卡忒寂寞無聊。彷徨戶外。仰視天空皓月。雖爲山林所掩。未能普照。而時復從樹梢石隙間。點點滲漏而入。清皎若水。不夜之城。殆不是過。正遠眺間。忽聞楷特們呼曰。尼卡忒君。請勿留連戶外。尼卡忒卽緩步入。以手指巨人而言曰。頃者見所未見。疑竇頗滋。此究爲何物所成。

百思而不得其解。幸見示焉。楷特們曰。君既信其爲人身。且復諦視多時。豈猶未能辨別耶。但君既見問。我當舉以相告。君其坐而聽之。尼卡忒既就坐。見楷特們吸煙如故。寂不一言。一若行所無事者。良久。尼卡忒躁急曰。君何濡滯若此。尙請速言。楷特們微笑曰。我所告君者非他。此果係一人身耳。尼卡忒曰。其爲死者之身乎。楷特們曰。何謂之死。又何謂之生。向者死而今始生耳。尼卡忒曰。君作隱語耶。吾實不解。楷特們曰。否否。我特準格致之理言之。尼卡忒曰。然則尙望質言。格致之理。非不精妙。其如淺人之不足與深語何。楷特們曰。質言之。則此特我之所製耳。尼卡忒曰。此君所製耶。特不識以何物成之。楷特們曰。悉準格致之理。而不外乎流質定。

質氣質三者而已。尼卡忒曰。吾未敢信。容再一審驗之。楷特們曰。不可。今非其時也。且君不見薛雷夫人所著之費蘭頓斯叮乎。書名書中曾言前有一人。閒步於荒塚之間。因毀棺出一屍。支而解之。配以各品。製成一可懼之人物。是人固未嘗不可製而成也。特我之製此。別有良法。初不忍效此殘暴之行耳。尼卡忒自忖此言不情不實。絕類癡狂。因大聲曰。然則究以何物配置之。楷特們曰。別有他物。蓋人之肌膚。雖製法極精。必有臭腐之一日。我因以他物代之。而又欲其面色如生。故時時煨煉。使與生人無異。迨既復其故。則雖久不致於臭腐。越一時後。請君一驗。必深歎我雕琢之精妙也。實告君。此仰臥於桌上者非他。其原質乃石耳。適聞耳目口鼻不

期自動。而胸臆亦呼吸不休。君少頃觀之。必且自疑前此之
目光撩亂矣。尼卡忒曰。然則其腹中有關鍵否。楷特們曰。五
臟皆具。與汝我曾無少異。豈特關鍵已乎。尼卡忒乃嘿思移
時。又曰。前言一時後容我觀之。時其至矣。楷特們探囊出時
計視之。曰。所差者惟五分耳。君其少待。尼卡忒曰。所以必達
至五分鐘以後者。其亦有他故否。楷特們曰。有之。然亦不能
預告。言畢。卽踉蹌至巨人側。周視良久。旋謂尼卡忒曰。時已
至矣。君既有未明之處。請自驗之。乃去其白絨之毯。巨人之
身。顯然畢露。尼卡忒既近其側。見其白無倫。幾與絨氈之色。
略無異致。審視多時。遂以手試一按摩。其指甫及。不覺驟縮。
蓋其堅如鐵。其冷如冰。毫髮爲之森豎。始知楷特們以石製

成之語。非虛謬也。

第八章 活動椅

楷特們曾言自後視之。必自疑前此所見。爲日光之撩亂。尼卡忒初不以爲信。迨旣觸其身。卽覺堅冷如鐵。殆將徹骨。始信其言不爲無因。惟明明忽而兀坐。忽而轉睛。忽而俯仰。忽而呼吸。如此靈活之身體。而謂偶像能之乎。何以前之所見若彼。而今之所驗又若此。倏忽變幻。至於斯極。真令人欲索解而無自矣。正遲疑間。楷特們乃微笑言曰。與前相較。君以爲若何。尼卡忒曰。前之所見。真乎幻乎。僕亦幾不自知矣。楷特們曰。頃刻之間。所見頓異。亦足見我之所製者巧矣。君今猶以匪類視我乎。抑恍然於我學術之高。格致之妙。而能刮

目相看耶。言時。兩目作作有芒。直注尼卡忒之面。尼卡忒淡
然答曰。汝設施狡計。使密司戈難斯幾喪其生。非匪類而何。
且不特戈難斯而已。其弟何辜。復施以毒。損二人之生命。以
爲一己之利。是可爲也。孰不可爲。楷特們曰。我非欲遽置諸
死地。爲暫時計。不得不爾。且我殺之。我亦能生之。此吾術之
所以卓絕於世也。尼卡忒曰。君旣強爲之說。我亦不與深辯。
第君欲謀其家產。是誠何心。卽此攘奪之名。雖有百喙。其何
能辭。楷特們聞言。顧而之他。旣而曰。吾惟與君論格致之理
而已。君所言。與格致之理何涉。尼卡忒曰。此與吾之責任。則
固大有關係也。楷特們曰。君之責任。其緝匪乎。尼卡忒曰。惟
君之視。君以我爲緝匪之人。則君卽以匪類自居矣。楷特們

不禁目光閃爍。迸射尼卡忒之身。大聲曰。噫。尼卡忒君乎。言未既。尼卡忒急止之曰。君毋爾爾。君亦憶所約之言否。楷特們曰。誠是我幾忘之。尼卡忒見其狂態大作。頗不自安。楷特們又曰。所立之約。斷不令自吾敗之。君亦宜加謹守。斯時既非爾我交涉之時。可置一切於勿論。試問君其急於遄歸乎。尼卡忒曰。天明後卽歸。楷特們略睨壁上之時鐘。微笑曰。甚善。然天旣就曙。吾又將撫此石人。蓋人格猶未完全。尙須加以播弄之功。以造其極。將來旣負完全之人格。則非特靈機透關。且能自呼其名。尼卡忒曰。君欲冀此像之起居言笑。盡類人身。吾恐君亦不能自信。何論他人。楷特們曰。我言非妄。君如不信。可暫留於此。以觀我之畢乃功。尼卡忒曰。逗留於

此非吾所願。且吾以爲以若所爲。求若所欲。奚啻緣木求魚。吾願君將此掉弄之事。且置勿圖。而圖其急於此事者。楷特們曰。何事。尼卡忒曰。君豈忘日間之約乎。蓋三小時以後。我又將爲捕汝計矣。楷特們曰。所約話別之後。再越三時。然後各自爲計。今既尙未別。曷請君少安毋躁。以畢餘言。尼卡忒不知其計。坦然復就椅坐。此室中所列之椅。均以籐爲之。其兩旁之倚手。可以任意轉移。能分能合。中間則設有極靈敏之機。機振一轉。倚手立合。人卽圍困其中。不能展動。楷特們之設此椅也。固非無意。當日尼卡忒坐猶未定。楷特們卽出雪茄一支。前以相授。既切近。卽乘間一握其機。尼卡忒驟觀此狀。知必有異。方欲起立。旋聞砉然一聲。鬪筭處已環合。

其前。泯然無迹。身錮椅中。不能復出。一時驚惶失措。力衝其闌。堅不能動。尼卡忒躁急愈甚。苦思無計。因欲以手著力。支其兩旁。漸漸縱身而上。躍出圍中。不意同時於椅之兩旁。突出無數尖利之小刃。巉巉上刺。稍一不慎。且及其膚。更覺無從著手。尼卡忒無可如何。祇得默然而坐。楷特們自遠望之。似有愧怍之色。曰。尼卡忒君。吾之圍君於此者。非有意背前此之約。特出於不得已耳。君其諒之。尼卡忒曰。今汝所爲。已顯背之。尙何諒爲。我惟悔前此立約時。未免信汝太深。致有此耳。楷特們曰。吾非敢加害於君也。特恐君不能久留。遂不惜侵君之自由。庶君之去留。操縱於我。而不得於未別以前。卽作三時後之預備耳。尼卡忒曰。然則君將何爲。楷特們曰。

非有他意。不過欲與君作竟夕之談。尊手旣舒轉自如。曷勿取所授之雪茄而吸之乎。尼卡忒猶未置答。楷特們又笑曰。君之性靜默雍容。殊甚趣也。尼卡忒曰。被錮於此。欲動而不能耳。我之性豈終靜嘿哉。楷特們曰。曩者我爲所擒。君雖稍覺不情。僕則已盡捐其嫌怨。今以揣君之心。恐不能如我之達。似猶有欲得而甘心者。尼卡忒曰。奚爲其不然也。楷特們曰。此固各行其是。特自我困之。不能自我縱之。須聽命於石人。如彼以爲可縱。則斯縱耳。尼卡忒曰。請勿作此誑語。天下甯有人不能自主。而反聽命於冥頑不靈之石人。且甯有石人而能言語者乎。楷特們曰。吾曾言人格完全而後。與人初無稍異。安見其爲不能耶。尼卡忒曰。此并不足以欺人。祇自

欺耳。楷特們不覺悻悻於色。曰。人皆以君爲通才。以此觀之。直下愚耳。尼卡忒曰。吾固愚。君則可謂癡絕。楷特們聞言。面部陡赤。目光如電。一時揚臂握拳。兇暴之形。不可逼視。尼卡忒自知語失。致激其怒。而身旣入此危險之境。又被錮椅中。不能動展。一時無計可施。惟憶懷中攜有手槍。設楷特們遽爾用武。祇有藉此以爲對付之策。主見旣定。乃急舉其右手。探入懷中。以爲最後之抵抗。而楷特們則狀如狂怒之獸。勢將奔噬。讀吾書者。至此當爲尼卡忒危。蓋設一決裂。二雄必有一傷。而一則散佚自如。一則身爲束縛。勝負之數。不待臨時而已決矣。

第九章。夜遁

尼卡忒處此危險之境。以爲必不能免。惟有昂首睜目。兀坐以待。未幾。而措特們兇惡可怖之狀。竟漸漸退去。繼乃長歎一聲。瞑目而倒於睡椅之上。尼卡忒見其狂態漸減。意始少安。然兩目則仍不敢略瞬。蓋恐其癡狂之態。愈而復作也。少選。措特們自椅起。不顧不言。遽自出門而去。尼卡忒以目送之。亦不置一辭。惟於其既去以後。自念己方內向坐。門以外均非目力所及。倘彼去而復返。保無他慮。遂以手握椅之兩旁。徐徐易其所向。注目俟之。豈知歷一時之久。曾不見措特們之入。又越一時許。而足音仍屬杳然。不覺神疲體憊。倦眼迷朦。稍一欹倚。則已酣然入夢矣。迨既覺。瞥見林間輝耀。旭日初升。徧顧室中。仍未見措特們蹤跡。屢揉倦眼。殊不耐煩。

忽憶及貯利器之盒。猶在懷中。雖此椅極爲堅固。斷之不易。然盒中有一絕小之鋸。鋒利無匹。曷不取而鋸之。倘能斷其倚手。即可脫然而出。惟身爲所困。取之殊甚費力。探索良久。始取入手中。試之於籐。雖未嘗格不相入。惟欲斷其所闌。亦非頃刻所能如願。第舍是更無求脫之策。不得不耐心竭力。以從事於此。遂并飢渴之交迫。亦置弗顧。手持利器。徐徐施鋸。俄而鋸之所及。已斷其半。思以手折之。則身在圍中。勢難用力。乃仍鋸之如前。斯時日已停午。陽光透入室中。而揩特們之蹤跡仍杳。回顧手中。鋸仍不輟。無何其籐分而爲二。身乃脫然而出。既起立。但覺徧體麻木。幾不能行。運動移時。始覺血氣流通。漸復其舊。遂舉步欲出。方及戶。忽又駐足。自思

此間非久留之地。身既出險。當速自爲計。或者乘車逕去。俟三小時以後。重來施捕。抑隱身於隱僻之處。俟其過返。就而擒之。決擇於二者之間。則後一說較便。惟與所約則不無相背。貯措特們以非禮加我。而我則斷不肯自背所約。中心既決。因復折回。步近其寫字桌。桌上置有紙筆。尼卡忒略睨壁上之報時鐘。書成一紙。其文如下。（措特們君鑒。爾雖未終守其約。吾則悉遵取約而行。今已十二時矣。我將去。謹書此作別。三時以後。所約之事已告終。特此知照。尼卡忒泐。）書成正欲向外。忽覩桌上之石人。好奇之心。又不覺勃然而發。自語曰。此像自日中視之。不知何似。遂復趨至其前。揭其所覆之氈毳。擲之於地。而巨人之身形。又畢呈於目前矣。白膩

精良。幾無與比。第昨見其棕色之髮。飄如飛蓬者。今乃知其爲雕琢之工。不過極神似耳。而以手觸之。則其堅與冷。猶如故也。所最奇者。則昨見其起臥如生。而今則其體竟不能稍屈。且措特們曾握其兩臂。舉置自如。今何以并不能稍易其處。默思許久。不得其故。不禁引頸而呼。以爲詭祕已極。不可思議。於是以氈毯覆之如前。大步而出。既出戶。回頭四顧。杳無人影。乃循其所來之路。猱升而上。抵昨晚停車之處。則車已失其所在。探測無從。不禁大失所望。默忖此必措特們乘之而去。不識其能重至斯處。使車復還。故主否也。繼念巨人之像。措特們詎肯棄之如遺。像旣在此。必不致一去不返。正遲疑問。忽聞汽笛之聲。嗚嗚然自薰風中吹送而至。尼卡忒

急隱林中以待之。既入。則車聲又復寂然。疑慮之心。不覺因而復作。方欲外出。瞥見措特們飛步而至。面有驚惶之色。亦不回顧。匆匆逕下。尼卡忒自語曰。但聞其聲。未見其車。自必停於稍遠之處。我曷不乘此往覓之。遂自林中出。向前而馳。約歷半句鐘之久。始得車於一英里以外。尼卡忒欣喜過望。急躍入車中。旋動其機。飛駛而去。明知措特們見已不在。必并力以追。或爲所及。惟心雖欲速。而道多險阻。偪仄難行。迨越數里。漸達康莊。車行之速。始倍於前。尼卡忒方足其機力。忽聞車後有追呼之聲。回首視之。則并力而前者非他。卽措特們也。措特們若早十五分鐘至此。則車正行於狹隘不平之地。必爲所及。而今則已入平陽大道。愈行愈捷。雖措特們

之并力兼行。終不可及。惟遙聞措特們且奔且呼曰。尼卡忒君。車行稍緩。有言面達。勿以相害爲慮。苟欲敗約。昨早行之矣。肆力狂呼。斷而復作。尼卡忒置若罔聞。疾馳逕去。久之。相距愈遠。其聲遂不可聞。尼卡忒自思措特們此來。必懷狡計。幸而已入康衢。未爲所及。思至此。不禁莞爾而笑。此時所行之路。廣而且平。且行人稀少。遂得竭力前駛。不啻風馳電掣。又念企克必已候之久矣。彼見我竟夕未歸。不知懸望何似。思忖之際。漸見人煙稠密。已抵一村。車即循之而前。詢得電話公司所在。即下車而入。逕達其意於該公司之幹事員。因即致電話於企克。已而覆音遞至。則非企克。乃尼卡忒之輔巴脫薛也。尼卡忒辨其聲。即詢以企克何在。巴脫薛答曰。企

克正外出尋君。尼卡忒曰。吾固無恙。今望代雇一汽車。卽煩君往覓企克。晤後。卽囑其於三小時內。速至是間。我立待之。倘一時未得其蹤跡。則君可自乘此車。速卽來此。巴脫薛應命。尼卡忒又曰。更有一事。警察員被錮樓中。刻猶未釋。君可代爲縱之。並望轉言。署中已據情相告。倘能曲諒苦衷。勿將禁錮之情爲外人道。尤感。巴脫薛唯唯。言訖。尼卡忒遂出。

第十章 巨人復現

尼卡忒自電話公司出。卽至近處一客寓中。聊以偃息。欲俟三小時以後。無論企克巴脫薛二人。孰來是處。卽偕往林麓之間。以逮捕揩特們。蓋尼卡忒之意。以爲揩特們珍此石人。萬不肯舍此而他適。已卽於三時後前往。彼未必能遽攜此

石人而遠遁也。繼又念昨夕所見之石人。生氣勃然。旋動自若。此事實爲費解。意者其爲催眠術所致耶。蓋惟善催眠術者。每能使人於莫須有之事。歷歷現入目中。一若確有所覩。猶憶前在印度時。見一術士搬演諸劇。以長繩擲諸空中。卽見其漸引漸上。縷縷不止。恍若天空之際。有人以援拽之者。旋有一小童援繩而上。直入雲中。自下望之。則小童兩足踏空。翩翩而舞。是時以觀者太衆。已乃置身於空曠之地。距其場稍遠。爲幻術之所不及。則繩與小童。俱杳不可見。蓋皆用催眠術有以致之。非真有援繩之小童。踏空而舞也。今之所見。得母類是。思忖間。忽覺腹中奇餒。始憶昨晚至今。尙未進食。乃卽命侍者具食。食旣畢。則已二點三十分鐘矣。自思企

克若來。當在此三十分鐘以內。遂坐俟之。俄而時鐘已屆三點十分。仍未見企克之至。因念約期已過。未見其來。是必有故。不若書一紙於此。而已先往焉。方取筆欲書。突聞汽笛鳴。狂鳴不已。未幾。巴脫薛與登企二人。疾趨而入。而企克則未與偕來。尼卡忒卽擲筆而起。告以昨夜所歷之境。略述大概。畢。因曰。我今卽乘此汽車。與君等偕往。何如。二人同聲曰。甚善。言畢。逕入車中。是時尼卡忒非常躁急。恨不立至其地。開足機力。疾馳而前。迨四點半時。始抵一極大之森林。卽昨夕所停車處也。三人下車後。尼卡忒卽曰。君等二人。不必皆入。吾意一守於外。一與我偕。然揣君等之意。俱以先入爲快。必不願留守於此。而孰留孰去。我亦未能妄言。無已。其以錢

卜之。字向上者。巴脫薛入。否則偕行者登企耳。二人允諾。尼卡忒卽以一錢擲地上。俯視之。遽呼曰。登企與我偕行。巴脫薛可留於戶外。旋又囑巴脫薛曰。苟有需於君。自當相喚。君可循此路而下。向右以旋之。卽是矣。囑旣畢。卽與巴脫薛別。相隨而下。不數十武。卽抵其室。則見雙扉緊閉。窗亦深扃。尼卡忒近前剝啄。良久。未有應者。又久之。仍寂然。遂轉身謂登企曰。豈楷特們知我之來。此室已不敢居乎。抑身在內而故弗應也。言訖。下視其鎖。則尋常之鑰。足以啟之。遂探囊出鑰。而門卽應手而開。門方闢。探首一望。則見寂寞悲涼。無殊荒塚。加以夕陽將下。戶牖皆扃。黑暗幾不能辨。尼卡忒見闌其無人。邁步逕進。旣入室。隨啟其窗。登企亦步亦趨。相隨不失。

此時尼卡忒所首先注意者。惟此巨人之像。以爲巨人而在。則楷特們必未遠遁。旋見桌上隆然高起。覆氈如故。心遂爲之一寬。並指示以告登企。不意啟其氈。則巨人已失所在。其所以隆然於中者。無非破衣敗紙之類。彼蓋料尼卡忒之必至。故覆此以欺之耳。此時此際。尼卡忒悵然木立。不知所爲。惟自恨來此太遲。致爲先期遁去。追悔無及。惟如此巨人。彼不知遷之何處。頗滋疑竇。回視各物。布置如前。所坐之籐椅。亦尙在其側。尼卡忒因指示登企曰。此卽楷特們所困我之椅也。我苟不乘間而逸。正不知楷特們將何以處我。登企曰。或爲所害。亦未可知。尼卡忒曰。事過境遷。今且弗論。特如此之巨像。楷特們不知何術以遷之。登企微笑曰。像之大果

如君言。遷殊不便。至便之法。惟有活之而使其自行耳。尼卡忒曰。君言毋乃戲耶。登企曰。否。亦實有其事。尼卡忒曰。其事若何。君試言之。登企曰。此說甚長。然爲是時計。殊無暇述此。君能允我緩以相告乎。僕以爲楷特們之蹤跡。或去未遠。是時正宜及早偵之。尼卡忒曰。善。遂疾趨至門外。彷徨四顧。嘿念楷特們之逸。惟有三路。中一路較闊。可以獐升而上。然挾此巨人以逃。殊不便於自下而上。舍此之外。則惟有室外之左右二路而已。至室前則均係條石鋪成。一望平陽。無跡可匿。亦不必偵。因謂登企曰。我等可先至左首以跡之。二人且行且顧。約越三四百碼之遠。則有一深潭在焉。潭之側。一巨石巍然而立。尼卡忒佇立其上。左顧右盼。謂登企曰。察其情

景楷特們必不在此。逗留無益。莫如自右偵之。二人遂復經小室之前。以達於右。距小室三四百碼之處。亦有一溪。溪側並無石路。盡係泥地。此時登企適繞出尼卡忒之前。忽大聲曰。此何物乎。速視速視。尼卡忒俯首視之。則見泥中印有極巨之足跡。深入數寸。其跡之巨。舍巨人而外。莫與比焉。巨跡乃緣溪而行。二人卽循其足之所至。偃僕而前。尼卡忒諦視許久。謂登企曰。細觀此跡。不惟碩大無朋。且其所印之狀。亦殊可異。登企曰。試言其異。尼卡忒曰。印此跡者。決非尋常人之足跡。若果爲尋常人所印。則五指間必較足心爲深。而此則深淺不分。謂非異乎。登企點首曰。然。聆君所言。始恍然於其足勢之堅。非鐵所成。必不爲之也。尼卡忒曰。君亦有所見。

乎。登企曰。我前在室中時。曾言或者石人自能運動。君以我爲戲言。其實非無徵也。尼卡忒曰。我幾忘之。君今可得而言矣。登企曰。吾少時。曾從學於年老之薩馬利人。據彼自言少壯之際。爲西藏人所禁錮。寄迹多年。在西藏時。所遇大可異之事。不一而足。其一卽偶像之行路也。尼卡忒愕然曰。信有此乎。登企曰。信然。此薩馬利人……言未畢。尼卡忒急傳聲止之曰。此何聲也。汝試聽之。當時尼卡忒所聞之聲。登企固亦聞之。二人遂注目於聲之所自出。未幾。二人同時驚呼失聲。狂駭欲絕。蓋距所立不及三十碼之遠。有一極茂之森林。瞥於林隙中。發見一非常高大之巨人。大步而出。全身畢露。腰以下僅覆一布。其首外向。植立林前。而舉其右手以指二

人。

第十一章 深潭

二人驟見此巨人之出。不覺駭極而呼。幾欲反身以逃。既而尼卡忒心少定。卽掣槍在手。亟納彈擊之。尼卡忒之槍法。固擊無不中。孰意煙焰旣散。則見巨人仍植立如故。尼卡忒見一槍不足以倒之。遂又疊撥火機。彈卽連續而出。再視之。則巨人已步入林中。不知所往。尼卡忒急前追之。登企亦緊隨於後。旣至巨人所立之處。則叢林蔽日。人跡杳然。穿林而入。約行數武之遙。仍不得巨人蹤跡。但見一石巍然。高逾二丈。石上爲山水所衝激。匯而成溪。白浪滔滔。勢如瀑布。尼卡忒旣無所見。心益疑訝。自語曰。巨人之行。何以若是之速。倏忽

之間。彼果何往。左右四顧。則壁立數仞。高不可躋。諒必不能拾級而登。卽登亦斷不能若是之速。因思瀑布之後。或有可以隱匿其軀者。遂離登企。繞石而前。旣及瀑布之處。則亂石嵯峨。地甚狹隘。不特此。巨人不能匿跡其間。卽幼稚之身軀。亦不能容。不覺大失所望。匆匆返至原處。謂登企曰。所遇絕奇。殊不可解。汝前言薩馬利人之事。說尙未畢。請續言之可乎。登企曰。彼言曾備於大喇嘛者數年。西藏之俗。亦非盡崇拜偶像者。而喇嘛之宮內。則有偶像五尊。分東西南北中。迭司其職。季一易之。相傳當其柄者。每能造福於人。五者之中。有名哥麥者。其像尤巨。據薩馬利人言。像俱以鈎製成。○金

質名一質甚堅固。而實輕於敗紙。曾聞鈎之製造。西藏得其

法最早。實爲各國所權輿。尼卡忒曰。然此質之發明。爲時固未久也。初製時費力殊甚。故其價格昂。登企又曰。彼所以能行動自如。實無足奇。蓋先使一人匿於其中。而後身之使臂。臂之使指。與自動者幾無以異。我師在西藏時。曾爲喇嘛所迫。令置身像內。出以駭人。匿其中者。果能惟我所欲爲。毫無輾轉不靈之患。素聞楷特們嘗游歷西藏。且曾居喇嘛宮中。意者得其祕製之術。返國後如法製之。以爲此駭人之舉。未可知也。尼卡忒曰。得君數言。使我疑頓釋。彼之所爲。殆亦如君所言耳。登企曰。吾師又言製成之後。設以白漆敷其外。則自表面觀之。直與白石無別。尼卡忒曰。旣爲鈗所成。吾意鈗質雖堅。槍彈亦必能洞穿而過。何以中而未倒。有如此者。登

企曰。或者內容甚大。未能適中於匿者之身。至其像則不識不知。初非血肉之體。縱彈穿其身。亦何能倒。尼卡忒聞言默爾移時。始徐徐言曰。君言誠是。然吾猶不能無疑焉。蓋此像既若是之巨。人匿於中。詎必適如其分。既難免有偏倚之處。何以左與右輕重適均。曾無絲毫之傾側。且明明倚於林前。一轉瞬而倏已不見。豈真有所謂凌虛駕空之術。如吾輩所不能查察者乎。登企曰。其身所以不偏側之故。則匿其中者固得而主之。至於避匿何方。則我亦未敢懸揣。尼卡忒曰。此中奧渺。殊不易測。然吾意楷特們身居像內。必不能於霎時之間。遠離是處。言至此。遽止。忽趨步至瀑布側。注目良久。瞿然曰。噫。吾知之矣。登企問曰。君豈有所悟耶。君豈以頃所見

之巨人。爲匿此水中耶。尼卡忒曰。非敢謂彼必匿於此。然舍是深潭。彼將安匿。至今惟入水以求之。登企俯身潭側。以手試之。曰。此水冷甚。殆逾於冰。尼卡忒且解其衣。且答曰。水雖寒。我必入之。非是無以釋我疑也。言畢。衣已盡解。遂攀援潭旁之石。徐徐而下。未幾卽攸然逝矣。約分餘鐘。又援石而上。此時夕陽將下。返映於潭水之旁。尼卡忒卽於日光中佇立移時。謂登企曰。此水固寒冷徹骨。然前特試之。未入至深處。今將復往。以覘其究竟。縱我入水稍久。爾亦毋驚。言畢。復躍身水中。登企目送其入。探囊出時計。以誌其時。蓋深知人於相需甚殷之際。卽爲時未久。心亦焦灼。有時計以準之。遲速較有把握。不謂時越三分。猶未見尼卡忒之上。登企以爲入

水既久。保無他慮。遂亦解衣赴之。衣既解。卽一躍而下。蓋登企年少時。薩馬利人每於嚴冬之際。教以鑿冰而游泳於水中。故游泳之術。本屬擅長。當日登企既入水。始覺潭水非常之深。既至底。昂首以望。則此時斜陽正映於潭水之上。分外光明。而俯視其下。則有一闊可容馬之石隙在焉。又復徧視四圍。則皆泯然無隙。因思偉人苟匿是間。則必在此石隙之內。可無疑義。而尼卡忒亦必由此以入。又思身既至此。必入而一探其異。遂徐徐自隙而下。未幾。豁然開朗。別有洞天。旁行不數武。又有一絕小之潭。潭水淺而平。並無波濤之洶湧。旁環以石。形圓而不啻井矣。距潭數碼之遙。有一石梯。高逾五丈。距梯巔約數尺。上懸一繩。動盪空中。而尼卡忒則鵠立

潭旁之石。正仰視石梯。聞登企入。急轉身低語謂曰。吾意楷特們必自此石梯而上。復援手於繩。以踞石巔。身既登。遂起其繩。使他人不得援手而上。且楷特們至此。必自石人中出。以身先登。然後舉石人以同上。君以爲然否。登企曰。君言誠是。非如此不能上也。尼卡忒又曰。是繩飄蕩空際。高不可攀。其將何術以登。不如暫返原處。更設他計。以施逮捕。登企點頭唯唯。於是仍自石隙中出。泗水及岸。抵前所解衣之處。各披其衣。着方畢。正思移步。陡聞室外驚踞之聲。與呼救之聲。相繼而至。側耳以聽。不覺大駭。蓋其聲酷似巴脫薛也。

第十二章 逮捕

尼卡忒驟聞此呼聲。急與登企自小室之前。攀援直上。疾趨

至巴脫薛所守處。則見巴脫薛倒臥於地。左頰已傷。血流如杵。神志昏然。閉目不能作一語。回顧汽車。則已失所在。惟隱聞汽笛噓噓之聲。諦聽之。則又寂然。尼卡忒覩此情景。知必有異。俯視巴脫薛所傷之處。乃係爲人所擊。因而倒地者。遂取身畔所攜之潑蘭地酒以飲之。繼以冷水潑其傷痕。潑畢。巴脫薛始稍稍甦。越五分鐘。兩目漸啟。傳聲曰。彼何往乎。尼卡忒急問曰。汝言何所指。巴脫薛曰。非他。卽擊我之巨人也。言時。身不寒而慄。尼卡忒曰。君非爲彼巨人所擊乎。雖然。未中要害。固無傷也。巴脫薛噤不能聲。尙未置答。尼卡忒又曰。此巨人者。乃摺特們竊西藏之法。祕製而成。初無足懼。遂以所遇之事。及登企所述諸語。一一告之。巴脫薛聞而恍然。乃

曰。我頃者方息偃於此。瞥見一巨人突如其來。我正駭極。呼。彼已直前一擊。遽中我頰。痛懼交并。遂昏然暈矣。是時巴脫薛疑團既釋。傷亦稍愈。乃自地而起。行動如常。尼卡忒已知楷特們不在此幽窟之間。株守於此。亦殊無謂。遂與巴登二人同向大路而行。途中。尼卡忒謂二人曰。楷特們詭祕不測。捕之非易。此時既乘汽車。不知仍匿於巨人身中。司其機器。抑身自外出。而與此巨人並坐以去也。登企微笑曰。如此巨人。而令其兀坐車中。行人見之。不將駭而大譁乎。言時。已自窄路而入康莊。忽見汽車停泊於路側。諦視之。則輪機已損。蓋楷特們於狹隘難行之處。足其汽機。盡力奔馳。勉強而行之。機遂因之而損。既損而不能馳驟。乃棄於道旁。尼卡忒

曰。彼既舍車而步。追之似較易矣。言畢。卽以身偃僕而前。俯察其足跡所在。良久。乃始得之。因謂二人曰。君等可隨我以行。觀途中所印足跡。楷特們已自巨人中出。竊負而逃。此像縱不甚重。然偉大而修。攜之必不甚便。我等速蹤跡之。或可追獲。三人遂飛步而前。約行百餘武。則見路側林木叢叢。參天蔽日。三人折入林中。探首四望。蹤影俱杳。尼卡忒疑慮復生。足爲少駐。蓋茫然不知其所往焉。默思移時。旋得一策。乃從容謂二人曰。今惟有分道以跡之。巴脫薛可自左以前。約百碼而止。登企自右。止亦如之。吾則由中道而馳。君等聞我之呼。然後由分而合。共入林中。二人唯唯。惟俟尼卡忒之命而行。是時爲六月中旬。晷影正長。日色雖漸西沈。天猶方

尼卡忒遂欲乘此日影稀微之際。追而獲之。蓋知楷特爲人。慣逞其陰詭不測之手段。施毒害人。狡變百出。苟一昏夜。則路途不稔。虛實不明。更末從着手矣。遂大聲謂二人曰。去去。三人遂共入林木。疾馳而往。一帶樹蔭接天。陰森若蓋。加以草滿不除。泯然無路。甚至離離沒脛。不能測地之高低。而路復崎嶇。祇得匍匐而進。不期巴登二人猶未及百碼之地。而尼卡忒忽於林中深處。頓遭不測。幾喪其生命焉。蓋尼卡忒正以枝幹交橫。阻格不能逕進。惟穿林入隙以前行。甫數十碼。其地荒草叢雜。不能舉足。正佇立四顧。思辨路以進。忽聞草聲悉索。一人疾躡於後。未及返顧。突有一手重壓其肩。力大勢猛。一時立足不定。遽然倒地。急視之。則其人非

他。卽楷特們也。楷特們既仆尼卡忒於地。更出一手力扼其喉。使不能呼救。蓋楷特們勇力過人。未嘗稍遜於尼卡忒。尼卡忒固於前。此禽彼時。已領略矣。自思喉爲所扼。非奮力以拒。身且不保。何以禽此凶人。但斯時氣湧欲塞。不能發聲。且巴登輩相距尙遠。卽令呼救。亦未必能聞聲而至。於是嚙唇嚼齒。奮相畢生之全力。掙札稍起。突以手握其髮。盡力拽之。楷特們驟爲所拽。首不能仰。俯於尼卡忒之肩旁。不能自主。二人各以性命相搏。狂鬪至數分鐘之久。相持不下。一時楷特們氣力就衰。其扼喉之手。略一鬆解。尼卡忒益大奮精神。乘勢起其兩足。俯伏於地。以握髮之手。猛力一麾。楷特們尙在堅持不捨。驟覺髮際痛不可忍。不禁釋其兩手。擲身

#87
976173

直顛出數武以外。去勢既猛。驟觸一大樹之上。一觸之。然暈絕。尼卡忒一躍自地上起。卽出囊中梏手之具。梏其手。旋呼登企及巴脫薛二人至。二人見楷特們就擒。欣慰無已。時楷特們已漸漸而蘇。然一任尼卡忒之相詰。絕口不言。三人遂亦一笑置之。而石人所在。終不可得。徧覓林中。竟無蹤跡。彼殆已先期毀棄之矣。當時巴登旣入。尼卡忒謂巴脫薛曰。客寓前所停之汽車。君可速乘之來。以便拽此壞車。而我等亦可乘歸也。巴脫薛應命去。未幾。卽聞汽笛嗚嗚。車已抵林前矣。尼卡忒卽命將壞車附屬於後。並挽楷特們共坐車中。馳回紐約。報告警署。復錮楷特們於獄。其後遂科以終身監禁云。

終

#87

970173